

Alkitab Buat Bocah
Nampilin



Daud Sang
Raja
(Bagian 1)



Nyeng nulis: Edward Hughes

Nyeng bikin gambar: Lazarus
Alastair Paterson

Nyeng nyocokin: Ruth Klassen

Nyeng terjemahin: Matheus Nalih Ungin


Dibikin buat: Bible for Children
www.M1914.org

©2023 Bible for Children, Inc.

Perijinan: Enté boleh ngegandain atau nyetak ini cerita,
selama enté kagak ngejualnya.



Daud muda dalem pelarian. Raja Saul pengen bangat ngebunuh dia. Daud netep di utan, di dalem goa sama empat ratus pengikutnya. Ampir aja, tentara-tentara Saul nemuin mereka. Tapi Daud pindah-pindah.



Pembantu Saul, Doeg, bilang sama raja kala para pendeta nulungin pelarian daud. Saul perentahin buat ngebunuh mereka. Tapi cuman Doeg nyeng pengen ngelakuin itu! Secara serampangan ia ngebunuh delapan puluh lima pendeta ama keluarganya pake pedangnya. Kejem bangat.





Satu ari, Saul
ngeburu Daud dan
jalan ke dalem goa
dimana Daud ama
orang-orangnya
ngumpet. Saul
dewekan.



Di dalem goa, Daud bisa dengan gampang ngebunuh Saul. Tapi, dia malahan ngrangkak ngedeketin dan motong sedikit dari pakean Saul pake piso belatinya



nyeng tajem. Pas Saul pegih, Daud manggil dia. "Sebab dari hal nyeng ada aku udah motong ujung bajumu dan kaga ngebunuh kamu, bisa kamu tau dan kamu liat, kalo tanganku bersih dari semua kejahatan."



Saul bilang kalo dia nyesel udah nyoba buat nyakin Daud. Tapi abis itu, marahnya nyeng lama muncul lagi dan dia ngumpulin tiga brebu tentaranya buat ngebunuh Daud. Satu malem, pas tentara-tentara itu pada pules, Daud ama Abisai, salah satu tentaranya, nyelinap masuk ke dalem kemah raja dimana Saul ngegeletak pules.






"Ari ini Allah udah
nyerahin musuhmu
ke dalem tanganmu."
Abisai ngebisikin.
"Karena itu ijinin
aku nunclebin dia ke
tanah pake tombak
ini : sekali tubles."





Daud nolak. Dia ngambil tombak ama kendi Saul, dan pegih ninggalin kemah. Dari bukit di seberang, Daud tereak sampe Saul bisa ngedenger suaranya. Sekali lagi Saul tau kalo Daud bisa ngebunuhnya, tapi Daud kaga ngelakuin itu. Sekalimlagi, Saul bilang kalo dia nyesel udah nyoba buat nyakinin Daud. Tapi Daud tau dia kaga bisa percaya ama omongan Saul.



Waktu itu Samuel mati. Dia itu nabi Tuhan nyeng kepada dia Tuhan bilang supaya ngeberkatin Saul, lantas Daud jadi raja atas Israel. Pas orang-orang Filistin nyerang Israel, Saul ngelakuin sesuatu nyeng ngeri, sesuatu nyeng dilarang Tuhan.



Dia nyuruh seorang perempuan buat manggil Samuel dari tempat dia mati. Malem itu, Saul ngedapetin satu pesen.



"Tuhan udah pegih ninggalin kamu dan udah jadi musuhmu... Tuhan udah ngerebut kerajaan dari tanganmu dan udah dikasihin ke orang laen yaitu Daud. Besok kamu ama anak-anakmu udah sama-sama aku. Begitu juga tentara Israel bakalan diserahin Tuhan ke dalem tangan orang Filistin." Pas Saul ngedenger soal itu dia nyungseb jatoh ke tanah saking takutnya.



Orang Filistin perang ngelawan Israel, dan orang-orang Israel ngibrit. Orang Filistin ngebunuh anak-anak laki-laki Saul juga Yonathan, sohibnya Daud.



Saul luka parah karena kena panah dari pemanah. Dan dia bilang sama nyeng bawa gegamannya, "Cabut pedangmu dan tubles aku, supaya jangan sampe orang-orang nyeng kaga sunat ini nubles aku dan ngejadiin aku kaya maenan." Tapi pembawa gegamannya kaga mao karena juga ketakutan. Lantas Saul ngambil pedang dan ngejatohin dirinya ke atas pedang.



Orang-orang
Filistin
nemuin
mayit
Saul
ama



anak-anaknya, dan maku
mayit mereka di tembok
kota Israel nyeng
direbut. (tembok kota
Bet-Sean). Beberapa
orang nyeng gagah
berani ngambil mayit
Saul ama anak-anaknya,
ngebawa mereka
pulang dan ngebakar
mayit mereka sebelon
dikuburin buat jadi
peringatan
bagi Israel.





Pas Daud denger kabar nyeng ngeri itu, dia berkabung dan nangis lantas puasa sampe malem buat Saul, buat Jonathan anaknya, dan buat jamaah Tuhan, karena mereka udah mati ama pedang.



Meski Saul udah nyoba buat ngebunuh Daud, Daud hormat banget sama Saul nyeng jadi satu-satunya orang nyeng diberkatin Tuhan sampe mati. Sekarang Tuhan ngehormatin Daud, dan ngejadiin dia raja buat istana Saul.



Daud Sang Raja (Bagian 1)

Sebuah cerita dari perkataannya Tuhan, Alkitab

Ditemuin di

1 Samuel 24-31; 2 Samuel 1-2

“Palang pintu Firman Engkau ngasih terang.”
Mazmur 119:130





Tamat



Ini cerita Alkitab nyeng nyeritain kita soal Tuhan kita nyeng kerén, nyeng nyiptain kita ama pengen enté kenal Dia. Tuhan tau kita udah bikin hal-hal nyeng kaga bae, nyeng Dia sebut dosa. Hukuman dosa ya mati, tapi Tuhan sayang bangat sama enté, Dia ngirim anaknya nyeng atu-atunya, Yesus, biar mati disalib dan dihukum karna dosa enté semua. Lantas Yesus idup dan balik lagi ke rumahnya ke Sorga. Kalo emang enté yakin ama Yesus dan minta biar Di maafin dosa-dosa enté, Dia bakalan ngelakuinnya! Dia bakalan dateng dan idup di dalem enté ini ari, dan enté bakalan idup ama Dia selamanya.

Kalo enté yakin ini kebenerannya, sautin ini ke Tuhan: Ya Yesus, ané percaya kalo Engkau itu Tuhan, dan berubah jadi manusia buat mati karna dosa ané, dan sekarang Engkau idup lagi. Tulung dateng kedalem idup ané sama maafin dosa-dosa ané, biar ané punya idup nyeng baru ini ari, dan entar bakalan pegih sama Engkau selamanya. Tulungin ané biar bisa nurutin Engkau dan idup buat Engkau ama anak Engkau. Amin.

Bacain Alkitab dan ngomong ke Tuhan tiap ari! Yohanes 3:16

